



Inatsisartunut ilaasortaq  
Randi Vestergaard Evaldsen, Demokraatit  
Maani/

19-11-2018  
Suliap nr.:2018-22863

Postboks 1601  
3900 Nuuk  
Tlf. (+299) 34 50 00  
E-mail: isiin@nanoq.gl  
www.naalakkersuisut.gl

## **Kina-miut uuliasiorfiutileqatigiiffiunik ataatsimeeqateqarnerit pillugit § 37 naapertorlugu apeqquteqaammumt nr. 285-imut akissut**

Kina-miut uuliasiorfiutileqatigiiffiunik ataatsimeeqateqarnerit pillugit Inatsisartut Suleriaasianni § 37, imm. 1 naapertorlugu, Naalakkersuisunut apeqquteqaammik nassiuussivutit. Apeqquteqaat uannut akisassanngorlugu innersuunneqarpoq.

**Apeqqut 1: DR-mi qarasaasiami nutaarsiassani, ulloq 31. oktobari 2018-mi saqqummiunneqartumi allaaserineqartutut Inuutissarsiornermut Naalakkersuisoq kiisalu Naalakkersuisoqarfimmi pisortaq taamatut imallit pillugit nunat allamiut uuliasioqatigiiffiannik ataatsimeeqateqarpat suna piginnaatitsissut tunngavigalugu? Inuutissarsiornermut Naalakkersuisoq Naalakkersuisunit piginnaatinneqarsimappat, tamanna akissummut ilannguteqquneqarpoq.**

### **Akissut:**

Ataatsimiinnerit taaneqartut ataani atsiortuusunga Inuussutissarsiornermut Nukissiuuteqarnermullu Naalakkersuisutut ingerlappakka. Ataatsimiinnernut atatillugu atorfilittannit, ilanngullugu Naalakkersuisoqarfimmi pisortaaneq, peqatigineqarpunga ikiorneqarlungalu.

Ataatsimiinnerni siunertaavoq Kalaallit Nunaanni uuliaqarsinnaaneranut soqutiginnilersitsinissaq.

Tassalu nittarsaassinermi ingerlatat nalinginnaasut, immikkut piginnaatitsissuteqarfigineqartariaqanngitsut, tassani pineqarput, tassami Kalaallit Nunaanni ikummatissiasaqarsinnaaneranut periusissianik ineriartortitsineq aamma nunani tamalaani nittarsaassineq, politikikkut akisussaaffeqarfinnut ilaatinneqarmat.

**Apeqquut 2: Iluamik paasisaqarsimanerpunga imaammammi piunasaqaataasoq uuliasioqatigiiffiit onshore-licensinik neqeroorfigineqassappata taava uuliasornissamut aningaasaliissuteqartoqarsimassasoq soorlu Naalakkersuisut tamanna nammineq siunnersuutigereeraat 2019-mut Aningaasanut Inatsisissamut atatillugu?**

**Akissut:**

Ataatsimiinnerni taaneqartuni Kalaallit Nunaanni akuersissutinut neqeroortitsinermut soqutiginnilersitsinissaq siunertaavoq. Taamaalilluni apeqquummut 1-imut akissuteqaammi allassimasutut, nittarsaassinernik ingerlataqarnerit tassani pineqarput.

Suliassap AIS2019-imi kontup pingaarnep 64.10.25-ip (Uuliasiornermut Gassisiornermullu periusissiaq) ataani siunnersuutigineqartup ingerlanneqarsimanissaa, taamatut neqeroortitsinermik ingerlatsinissamut piunasaqaataanngilaq.

Kisiannili Naalakkersuisut isumaqarput, aningaasaliissutissatut siunnersuutigineqartut aammalu sajupillatsitsisarnernit paasisutissanik katersinissaq pillugu suliassap tassunga atasup ingerlanneqarnerata, sumiiffimmi uuliaqarsinnaanerata paasilluarnerunissaa siunertaralugu, neqeroortitsinermut pisussamut atatillugu qinnuteqarsinnaasussanik pilerilersitsinissamut periarfissat pitsaanerulersissinnaagaat. Kisianni tamanna apeqquummi allassimasutut piunasaqaataanngilaq.

**Apeqquut 3: Inuutissarsiornermut Naalakkersuisup Naalakkersuisoqarfimmilu pisortap kiniserit uuliasioqatigiiffiannik ataatsimeeqateqarsimanerat Naalakkersuisut qanoq isumaqarfigaat, naak ilisimalluaraluarlugu massakkorpiaq 2019-mut Aningaasanut Inatsisissaq sularineqartoq, tassanilu Naalakkersuisut kissaateqarnikuusut uuliasiornermummut aningaasaliissuteqartoqassasoq malunnartumik?**

**Akissut:**

Apeqquummut 1-imut aamma 2-mut akissuteqaammi matuma siuliani allassimasutut, ataatsimiinnerit pineqartut Kalaallit Nunaata uuliaqarsinnaanerani nittarsaassilluni nalinginnaasumik ingerlataqarnernut ilaatillugu ingerlanneqarput.

**Apeqquut 4: Aatsitassarsiornermut pilersaarut nutaaq pillugu siunnersuummik qaqugu Inatsisartut saqqummiivigineqassamaarpat maannakkut pilersaarummut 2018-p naanerani atorunnaartussamut taartissamik?**

**Akissut:**

Piffissamut 2019-2023-imut uuliasiornermut gassisiornermullu suliassaqarfimmi periusissiaq nutaaq sularineqaleruttorpoq.

Missingiut qaammatit 1 – 2 iluanni tusarniaassutigalugu nassiunneqassasoq  
naatsorsuutigineqarpoq.

Inussiarnersumik inuulluaqqusillunga



Aqqalu Jerimiassen